

Badische Landesbibliothek Karlsruhe

Digitale Sammlung der Badischen Landesbibliothek Karlsruhe

**Meditationum evangelicarum pars tertia, hoc est:
Tractatio evangeliorum tam dominicalium, quam
festivalium, ad recte se sub variis tentationum generibus
gerendum, disposita**

Creide, Hartmann

Francofurti ad Moenum, 1682

De secundo

[urn:nbn:de:bsz:31-126133](#)

quam possunt : Hinc conscientia sauciat, quæ si evigilat, sèpè homines ad desperationem adigit, ut Caini, Saulis, Judæ, aliorumque exempla probant.

3. *Vitam abbreviat.* Nam stultum occidit indignatio, & insipientem interficit zelus, Job. 5. v. 2., unde & inter opera carnis recensetur, Gal. 5. v. 21.

III. *Implacabilitatis culpam,* quæ in multis tantas radices egit, ut in inimicitia mori malint, quam proximo ignoscere. Sunt hi nefari homines, quos Scriptura pro homicidio habet. Omnis, qui odit fratrem, homicida est, & scitis, quoniam omnis homicida non habet vitam æternam in seipso manentem, 1. Joh. 3. v. 15. Hinc & religio eorum vana est, precatio inefficax, & spes frustranea, quamdiu in implacabilitate vivunt. Incedunt in via complanata lapidibus, & in fine illorum, profunditas inferni, Sir. 21. v. 11.

Hoc ita probati potest: Ubi odium & invidentia regnat, ibi caritas non est, caritas enim non æmulatur, 1. Cor. 13. v. 4. ubi caritas non est, ibi nec fides est: fides enim per caritatem efficax est, Gal. 5. v. 6. ubi fides nulla, ibi nec bona conscientia, fides enim corda purificat, Acto 15. v. 9. ubi bona conscientia non est, ibi nulla ad Deum fiducia, 1. Joh 3. v. 21. ubi nulla ad Deum fiducia, ibi nec vita. Nam in Deo vivimus, movemur, & sumus. Act. 17. v. 18. Ubi vita nulla, ibi nec salus, salus enim est perpetua vita, Sap. 5. v. 16. Quicunque igitur in implacabilitate perseverat, salutem & vitam æternam amittit, quæ majoris estimanda, quam universus mundus. Quid enim prodesset homini, si universum mundum lucaretur, animæ

verò suæ detrimentum patiatur, Matth. 16. v. 26.

Inter Themistoclem & Aristidem diuturnæ inimicitiae & similitates fuerant. Otto verò bello Persico Collegæsibi invicem adjungebantur in gravissima legatione. Tum Aristides: *Cessent inter nos inimicitiae, quia alibi satis est effusus sanguinis.* Hi gentiles fuerunt, nec tanquam similitates fore voluerunt: quantò magis nos iram & indignationem deponamus, Col. 3. v. 7. & in pace & concordia cum proximo vivere studeamus. Memento novissimorum, & desine inimicari. Sir. 28. v. 6. 7.

De Secundo.

Sequitur Medela, quæ fluit

1. *Ex justitia abundantioris premio.* Nisi enim abundaverit justitia vestra plus, quam Scribarum & Phariseorum, non intrabitis in Regnum cœlorum. Ex quo è contrario conlequitur, quod si abundaverit, Regnum cœlorum nos expectet.

Quoties terreni Reges & Principes de Regnis terrenis disceptant, ut sèpè sanguinem cum vita profundant & nil est nisi particula terræ, vanitatis subjecta, & quando minus hâc de te cogitant, à morte abripiuntur, & cum interierint non sument omnia, neque descendet cum eis gloria eorum, Psal. 49. v. 18. In morte enim Imperatoria Majestas cessat, im *Zode har sichs aufgefahrscht / dixit Ferdinandus I. R. Imp. h. e.* ut Salomo aliis verbis id exprimit: Non manet corona à generatione in generationem, Prov. 27. v. 23.

Danieli quatuor Regna, in terris futura, ostenduntur, ubi sunt illa & unum

yy 2 post

post alterum transiit, & quamvis Romanum Imperium adhuc duret, attamen digiti pedum ex parte ferrei, & ex parte fictiles sunt: & haud difficulter conjicimus, fore, ut invictissimus Imperator Christus Iesus, propediem cum ultimo suo adventu irrupturus, & huic, ut & omnibus aliis Regnis finem impositurus sit, Dan. 2. v. 38. 41. 44.

Verum Regnum Dei, quod hereditatio consequemur, quando aliam eamque meliorem justitiam queremus, quam Christus nobis acquisivit, Regnum aeternum est, quod non commovebitur, Psal. 93. v. t.

Ibi magnificè habitabimns, nempè in Palatio non manu facto, cuius edificationem ex Deo habebimus, 2. Cor. 5. v. 1. Apparitores nostrinon erunt Principes, Comites & Nobiles, ut in aula Imperatorum & Regum fieri amat, sed sancti Angeli & Archangeli, Cherubini & Seraphini: sicuti jam tum in hoc seculo Spiritus administratorii sunt, Hebr. 1. v. ult. Corona, quam nobis Dominus imponet, erit corona vita, Apoc. 2. v. 10. corona justitiae, 2. Tim 4. v. 8. immarcessibilis gloriae corona, 1. Petr. 5. v. 4. quae in aeternum non afferetur a nobis, Joh. 16. v. 22. Edanheimer, & quoniam in Regno hujus Regis judicium diligitur, Psal. 99. v. 4. apprimè studeamus, ut abnegantes impietatem, & secularia desideria, modestè, & justè, & pie vivamus in hoc seculo, expectantes beatam spem, & adventum gloriae magni Dei, & Salvatoris nostri Iesu Christi, Tit. 2. v. 13. & seqq.

II. Ex singulari hominis privilegio, quem Deus in tutelam suam recepit, & severè

prohibuit, ut eum neque verbis neque operibus, neque cogitationibus neque gestibus, neque corde, neque ore, neque oculis neque manibus laedamus. Prohibuit Deus ne cum ipso irascamur, ne ipsum morosè intueamur, ne ipsum calumniis & execrationibus oneremus, multò minus ullo modo manus ipsi inferamus violentas & sic Deus unicuique proximum suum commendavit, Sir. 17. v. 12. ut illum diligamus sicut nos ipsos, Levit. 19. v. 18.

Hominem Romanum non facilè licuit vincire & flagellare, Act. 22. v. 25. Verum majosris faciendum est civicum jus spirituale in Ecclesia. Qui enim proximus & frater noster in Christo factus reverenter habendus est, ne temere laedatur, ut Petrus mandat, 2. Petr. 1. v. 6. seqq.

Hoc privilegio adhuc hodie omnes gaudemus: Sicut enim proximum nobis commendavit Deus: sic & nos vicissim proximo commendavit, ut ipsi non liceat, iracundia, inadvertentia, inimicitia, vindictæ cupiditate, insidiis, vi & malitia nos prosequi, sicut nec nobis concessum est, ipsi horum quicquam inferre. Hoc solarium nostrum, haec prærogativa nostra est; qui ad hanc legem vitam non componit, hoc ipsis fit judicio, concilio & gehennæ ignis reus. Magnatum patrocinium tempore belli sèpè cum consolationem rùm gaudium parit: Verum Deus multò melius & gravius patrocinium nobis præstítit. In quinto præcepto præsidio munivit corpus & vitam nostram. In sexto uxorem & liberos. In septimo facultates & opes. In octavo bonam famam, ne quis vel cogitationibus, affectibus, verbis vel gestibus nos infestet, si Dei amicusesse, & ab igne infernali

nali immunis esse velit. Hæc magna consolatione est, quâ pîi in omnibus adversitatibus confirmare se possunt. Nam si Deus pro nobis, quis contrâ nos? Rom. 8. v. 32.

III. Ex longanimitatis divina rivo, quæ hinc elucescit, quod Christus ait: Si offeramus munus nostrum ad altare, & ibi recordati fuerimus, quod frater noster habeat aliquid adversum nos, ut relinquamus ibi munus nostrum ante altare, & vadamus prius, & reconciliemur fratri nostro. Interēa Deus nos tamdiu præstolatus est, dum eamus & redeamus & reconciliati sumus fratri nostro. Quis tale quid coram Magnatibus terrenis auderet? Si quis impetrata audientia, causam suam propositurus, in conclavi Principes recordaretur rerum domesticarum, abiretque domum ad eas expediendas, & tunc demum rediret, querens suam expositurus, quâ ratione ille exciperetur à Principe? vix alia vice admittetur. Sed Deus ter Opt. Max. tantâ benignitate & mansuetudine ergâ nos præditus est, ut tantisper cultum suum differri velit, quin & ipse jubet nos cum proximo in gratiam redire, deinde remeare, & munus nostrum offerre, quod hoc modò fibigratum & acceptum fore, pollicetur.

Nonne verò hæc magna patientia & longanimitas, quam Rex Regum & Dominus Dominantium, 1. Tim. 6. v. 15. qui excelsior cœlo est, & profundiior inferno, longior terra mensura ejus, & latior mari, Job. 11. v. 8. 9. ergâ nos miseris hominibus probat? quos jure optimo ad infernum detrudere possit, ratione magnæ inobedientiæ, quâ ipsum offendimus, ut

impleat, Osc. II. v. 8. Hæc consolatione stra sit, si ex imbecillitate humanâ in delicto aliquo præoccupati fuerimus, ne desperemus, sed cogitemus, Deum esse propitium & misericordem, ideoque locum daturum pœnitentiæ. Est enim verus φιλόλυχος, Sap. II. v. 27. nec delectatur in perditionibus nostris, Tob. 3. v. 22. sed multum parcendo nos regit, Sap. 12. v. 18. utrum in tempore gratiæ resipiscere velimus à Diaboli laqueis, à quo captivi teneamur, ad ipsius voluntatem, 2. Timoth. 2. v. ult.

De Tertio.

Superest Cautela, quam tribus includimus Regulis, quarum

1. *Justitiam sectare.* Hic Christum, cum Scribatum & Pharisæorum justitia minime contentum esse audimus: aliam vero requirit justitiam, quæ coram Deo valeat, Rom. 10. v. 3. Deus enim in generatione justa est, Psal. 14. v. 6. Injusti vero Regnum Dei non hereditabunt, 1. Cor. 6. v. 9.

Hæc justitia considerari potest bifariam:

1. *Secundum legem*, cuius summam Christus enarrat, Matth. 22. v. 37. Hæc vero ratione impossibile nobis est, legem Dei implere, lex enim spiritualis est, nos vero carnales sumus, venundati sub peccato: hinc quidem delectamur lege Dei secundum interiorum hominem: videmus autem aliam legem in membris nostris, repugnantem legi mentis nostræ, Rom. 7. v. 22. 23.

2. *Secundum fidem*, quatenus Christus eam nobis acquisivit,